

四庫全書

集部

欽定四庫全書

集部

宋百家詩存卷二十五

詳校官監察御史臣孫家賢

主事銜臣徐以坤覆勘

總校官庶吉士臣倉聖脉

校對官中書臣李 奎

謄錄監生臣孫 炯

欽定四庫全書

宋百家詩存卷二十五

嘉善曹庭棟編

野谷詩集

趙汝燧字明翁汴都人寧宗初登進士第授館職開禧丁卯被劾去官嘉定中起為鎮江筦權分司筦權舊用武目時更以文臣邑最之人汝燧預焉嘗蓄東坡書少陵夏夜歎蜀人趙子雲畫李杜像及古琴一

張命曰三珍出入每攜以自隨有野谷詩集六卷其  
古體詩氣雄筆健遠追太白近接坡公今體詩造境  
奇而命意新與四靈分壇樹幟直欲更出一頭地也

廣寒遊

九秋半規月團團瓊瑤世界夜氣寒羽士躍身道阿瞞  
麾斥八極青雲端老柯擲桂香不死銀橋跨空一萬里  
飛步抽簪扣玉局中有素娥三千人綠瞳翦水鬢堆霧  
風卷縞袖條脫露琅璈雲笛廣庭舞笑乘白鸞弄蟾兔

歸裁仙曲作霓裳  
天音盡洗凡絲簧  
霞裾星珮羅兩行  
玉環垂手春風場  
尊前盡日看未足  
絳膏泣鳳夜繼燭  
宮商忽變不可聽  
馬嵬斜谷雨霖鈴

古別離

妾離父母來從君  
相期百年終此身  
初合鸞凰席未煖  
熟視睂目識未真  
兵符捉人夜調遣  
丁寧尅日到邊面  
紅旗在手弓在腰  
花驄一躍迅於箭  
回頭語我勿慘傷  
歸來印斗金帶黃  
我聞軍功未易就  
膏血紫塞十八九

嫁狗逐狗鷄逐鷄耿耿不寐展轉思吠月啼曉喧孤幃  
淚雨千行心肝摧與其眼穿萬里見無日何如同赴沙  
場戰死俱白骨

纏頭曲

阿蠻妙舞翠袖長臂鞞珠絡帶寶裝春風按試清元殿  
粉白黛綠立兩傍三郎老手打羯鼓太真纖指彈龍香  
瑩篌野狐拍懷智威策龜年笛寧王中有八姨坐綺席  
澹掃蛾眉壓宮妝醉看阿蠻小垂手飛燕輕盈驚鴻翔

八姨指揮三郎聽頌賚豈惜傾篋箱纏頭一局三百萬  
莫遣傍人笑大唐尾聲方斷地衣卷忽聞鼙鼓喧漁陽  
播遷纔出望賢路玉食未進日卓午糲飯胡餅能幾許  
不飽皇孫及妃主阿蠻知是何處去但見豬龍自旋舞

妾薄命

冶容麗質世鮮比擇對年少風流子並闌觀魚雙戲水  
妾心郎心誓如此一朝結束萬里行東欲到海西到秦  
醉中慷慨躍馬去出門十年無信音或傳淫蕩歸不得

或傳已作泉下客郎兮郎兮奈若何恨淚徹夜孤枕滴  
君不聞鶯鶯錦字寄西遊玉環綵絲意綢繆郎心忍向  
他人笑下牀徒自為郎羞又不聞盼盼尊前小垂手燕  
子樓深情獨厚豈期紅粉遽成灰怨句空吟三百首

瑤娥曲

一三四月如眉積累如梳截半規玉斧晝夜修不輟  
修成團鏡當空垂十眉有樣列象几梳裁春冰鏡涵水  
瑤娥睡起拂菱花掃黛插鬢雲繞指斂袂亭亭天上妝



環珮隱體瓊琳鏘駿鸞跨鶴舞仙譜子登彈璈飛瓊簧  
天風颼颼冷到骨銀河澎浪濺羅韞一輪千古廣寒深  
折盡桂花應白髮

斷腸曲

憑欄日日望歸驕書來又報瀟湘遊卷書默坐淚自雨  
彈向花上花替愁想郎快意揚州鶴風光何地非行樂  
妾腸寸斷郎豈知獨步苔堦空聽鵲風瀟碧紗夜窻深  
弄針燈下無心情蜀羅一段茸五色看定鴛鴦繡不成

妾貌留春春要去妝鏡孤鸞無力舞  
轆轤咿啞殘夢驚  
曉嘶似是郎馬聲卷簾無人簾再下  
遣童水東占打瓦

銅雀臺辭

屋一百閒臺十丈岩堯突兀九霄上  
明月空照八尺牀  
幾點酸風搖總帳離宮金鑠掣不開  
美人紅粉今成灰  
蘭麝分恩銷餘馥銅雀飛去無時回  
大官朝暮薦酒脯  
迷魂尚愛殘歌舞戀戀西陵一抔土  
上馬橫槊平明詫

英武

義獸行

君不見明皇有象能拜舞看定祿山瞪目怒又不見昭  
宗有猴能起居望見全忠奮臂呼兩朝玩物固喪志異  
類報國乃仗義天寶大駕蜀道巡開平初元唐祚傾百  
僚奉賊身盡竄宰相畏族神不寧爾象爾猴忿且瞋其  
面雖獸心則人當時節士知有幾壯哉義獸不怕死

響卜辭

三六乘鸞初嫁君琴瑟朝暮誓不分酒酣使氣浪自許

片石儀秦弄風雲東吳西蜀幾千里鴈來數年無幅紙  
有使我必寄錦牋豈應皆沈石頭水酸風一點淚兩行  
憑欄瞥過雙鴛鴦霜花迫簾冷蠟焰雨梧傍枕敲銀牀  
乞靈每日扣巫祝更向靜處聽響卜人言卯夜驗不差  
又言元宵應尤速二說果如神俱占敢厭頻齋心通我  
意側步潛我身或圻翠幌視或靠綠窗避兩夕行人語  
字字還家意羅襪走褪奔繡幃懽喜無地魂天飛小兒  
放嬌來牽衣抱我門前接爺歸

寄遠曲

君馬踏邊塵繡幃妾一身仰天無過鴈俯水無游鱗酒  
難獨自酌蟻尊空浮春食亦不知味駝峯徒薦珍憶昔  
送君君已醉醉言更戍一年事兜鍪北去幾寒暑兩地  
肝腸摧萬里別來容貌似舊無寄去衣裳知到未折柳  
絲絲紫塞心對花片片青春淚夜聞琴瑟鼓鄰家人皆  
齊眉老年華不忍恨君翻自恨長吁矯首天之涯幾度  
虛傳歸信息愛聽乾鵲怕聽鴉孤枕有時髻鬢夢中見

覺來霜角咽梅花

耕織歎二首

春催農工動阡陌耕犁紛紜牛背血種蒔已徧復耘耔  
久晴渴雨車聲發往來邏視曉夕忙香穗垂頭秋登場  
一年苦辛今幸熟壯兒健婦爭埽倉官輸私負索交至  
勺合不留但糠粃我腹不飽飽他人終日茅檐愁餓死

又

春氣薰陶蠶動紙采桑女兒閨如市晝飼夜餽時分盤

扃門謝客謹俗忌雪團落架抽繭絲小姑繅車婦織機  
全家勤勞各有望翁媪處分將裁衣官輸私負索交至  
尺寸不留但箱笥我身不煖煖他人終日茅檐愁凍死

短歌行

赤龍駕輪飛上天倏東倏西晝夜旋流光萬古去不返  
少壯翻手成華顛閭風層城羽衣仙方瞳綠髮耕芝田  
玉樓貯春春不老蟠桃一實三千年吾欲訪仙弱水隔  
住世奈此急景煎茫朕無計相留連打併萬事不放到

眼前右杯左蟹拍浮百斛船

漁父四時曲

春

霽江浮春新水肥  
粼粼鴨綠東風微波心  
上下舴艋滑  
釣車香餌卷落暉  
纖鱗噉喙錦穿柳  
半留賣錢半換酒  
爛醉茅檐紅杏家  
折花簪髮把兩手  
沙岸尋芳青驄嘶  
彈絲吹竹挾蛾眉  
笑指漁父何寂莫  
漁父掉頭我自樂

夏



煙溪流碧浸炎空  
滌濯裨蒸蒹葭風  
大港小港涼世界  
隔隄荷蕩香到蓬  
儂家生長舟一葉  
豈識人間半點熱  
青笠綠蓑山雨來  
雨過波平夜撐月  
水亭避暑冰玉肌  
枕設珊瑚簟琉璃  
笑指漁父何辛苦  
漁父掉頭渾不顧

秋

新鴈銜秋訪水涯  
分屯洲渚傍蘆花  
停橈相約結溪社  
來往無嫌同一家  
酒酣把笛吹邨曲  
聲曳蘭風入山腹  
釣竿到手萬事輕  
孰是孰非孰榮辱  
江樓邀月粉黛濃

簞瓊嘈雜徹桂宮笑指漁父何冷落漁父掉頭吾豈錯

冬

六花坼凍雲糝糊釣鉤空擲寒無魚繫舟枯柳歸茅舍  
撥火煨薪擁地爐賒鄰一榼醅醱玉老稚分霑春回谷  
重來解維放夜筒橫風打向別港宿溪館對雪歌妓圍  
釜出駝峯酒羔兒笑指漁父何顛顛漁父掉頭但稱醉

東湖歌

湖光蕩綠春拍塞百雉之東纔咫尺五步一亭十步榭

軒窗處處臨水闌露濃晝淑花溜紅煙嫩隄平草連碧  
俯窺萍罇魚上下仰聽木杪禽格磔拂拭塵埃讀祖碑  
摩挲峯竅憐盧石中年懷抱多感慨東西跳丸駒過隙  
山林鐘鼎同一盞可笑世網甘形役甕邊吏部真得計  
右酒左蟹船中拍明朝風雨那可料且對湖山醉今夕  
沙鷗許我再尋盟從此時攜杖頭百

人謂盧肇石三峯  
九竅梅聖俞和盧

石詩云高峯削出嵩華  
骨虛竅鑿破蛟螭額

### 禹穴行

浙江之東千巖出參差半天氣蔥鬱禹昔不返南巡車  
越人交口說遺跡日往月來三千春宮有龍瑞洞陽明  
撥深涉危辨舊穴謠以傳謠終難尋荒山一片老風雨  
徘徊問山山無語寒林朝號萬壑秋冷煙暮結太古愁  
誰能為起馬遷死指點當時所探何處是

蒙泉行

二十年前客中都壁間誰挂蒙泉圖天造地設有如此  
果若所畫疑蓬壺御風來遊洞庭北此境突兀眼前出

荆門之外天下稀，翻思畫圖纔髣髴。  
山根寒源月一泓，細流循沼曲折分。  
天光倒影瀉晴碧，對此洗我瀟灑心。  
雲木枕崖影濕翠，金蓮鋪鏡葩在水。  
流觴自是摹蘭亭，山陰今日那得爾。  
向暮深林啼子規，柳花作團貼水飛。  
吟興未盡征馬嘶，他時清夢猶見之。

楚觀歌

吾聞楚鄉江山多勝處，人之楚觀尤得江山趣。  
萬象排攷索應酬，丹青閣筆無所措。  
大則湘水小臨蒸，衆流合

派銀河傾陶寫秋氣浸明月夜波爽透百雉城右則鴈  
峯左石鼓雙屏競秀蒼龍舞吞吐嵐光飛亂雲涼風暝  
送兩崖雨江山之趣於此無不宜朝暮變化愈出而愈  
奇最愛鷗鷺甘冷澹占斷汀渚供娛嬉東塗西抹晚煙  
翠漁父歸舟卷釣餌鼓枻而歌倚半醉中有滄浪濯纓  
意杜若一片迷芳洲憑欄懷古生新愁更上崔嵬千尺  
湘春樓縱目乾坤盡見衡嶽秋

楚觀在湖南憲圃湘  
春樓在楚觀之後

八景歌

長沙志載度支宋迪工畫尤喜為平遠山水其  
得意者有平沙鴈落遠浦帆歸山市晴嵐江天  
暮雪洞庭秋月瀟湘夜雨煙寺晚鐘漁邨落照  
謂之八景余昔常見圖本及來湖湘遊目騁懷  
盡得真趣遂作八景歌

嗷嗷哀鳴肅肅羽寬清意爽愛湘楚西風作惡陣腳散  
斜行千眼下煙浦飛力已困日且晡便欲就宿依寒蘆  
大者居中圍以奴丁寧緩急相驚呼嗟此何景兮平沙

鴈落丹青欲畫未易著

晚日放晴雨腳收楚山千里江吞秋上水風生荻花渚  
漠漠幅蒲天際浮輕雲驟掩目力斷雲消似過芳洲半  
危檣逐鳥惟恐緩燕子爭飛先到岸嗟此何景兮遠浦  
帆歸丹青欲畫殊堪啞

朝氛吐吞影模糊嫩日隱見光卷舒湘巒滴翠石徑滑  
遠近憧憧人趁虛天風作意扶霽色噓拂昏翳半明滅  
槿籬髣髴橘林隔一竿斜插酒旌揭嗟此何景兮山市



晴嵐丹青欲畫良獨難

雲擁黃昏朔風急長空杳杳水拍拍六花舞白徧三湘  
失卻寒峯翠千尺片瓊屑玉響羣林蘆叢蕭瑟聲更清  
凍月開奩俄吐晴銀宮一色上下明嗟此何景兮江天  
暮雪丹青欲畫不可得

西顥沈碣露花白河漢浩浩浴素魄平湖萬頃搖銀光  
祇留君山一點碧帝子揚靈駕飛龍鼓瑟來遊水精宮  
聲徹桂娥亦斂容葉下北渚嫋嫋風嗟此何景兮洞庭

欽定四庫全書

宋百家詩存  
卷二十五

十三

秋月丹青欲畫那免拙

楚天濃雲如墨潑通宵滂沱翻江閱寒聲偏撼蒹葭林  
要將秋容洗到骨杜若洲有鴻鴈棲震凌喧夢時驚疑  
釣翁醉睡卻不知椿脫纜斷船偷移嗟此何景兮瀟湘  
夜雨丹青欲畫浪自苦

西嶺驟晴銷殘暉芷岸蘭汀堆夕霏數聲撞空九天半  
如有招提隱翠微風助餘音響崖谷蕭蕭暝港孤舟宿  
禪關棲鳥爭寒木歸僧疾步穿山麓嗟此何景兮煙寺

晚鐘丹青欲畫馬能窮

積雨初過湘水滿夕陽蕩金接天遠影挂寒層江步斜  
紅殘茅檐沙港晚小艇澤畔收釣緡鼓柁滄浪歌濯纓  
醉眼西望送沈輪繫纜籬根穿錦鱗嗟此何景兮漁邨  
落照丹青欲畫無由妙

仙湖歌

湖之綠兮如藍湖之明兮如鏡藍染晴空晚色鮮鏡照  
天宇秋毫淨乾坤兩間共開闢魚鳥四時自飛泳炎州

著腳苦蒸鬱對此恍入清涼境其東羣木合抱森觀政  
觀魚連秀陰濂泉沸甃珠的皦飲瓢洗我太古心其西  
冰壺爽到骨曉波澄秋夜印月藏春園種雜花稠分得  
庾梅攬先發其南粉雉霄漢橫旋補楊柳沿隄青上下  
天光同一碧我來拈出營新亭其北干片石洲石或虬  
或鳳或劍戟環流軒館瘴霧收檐影倒漾水底日葛仙  
昔煉九轉丹丹成飛上羅浮山海邊亭外春萬里御風  
忽挹仙翁袂翁乘飈車擁霓旌約我十二樓五城翁言

羽化世已久問湖風月依舊否

仙湖在廣東漕沼乃葛仙翁煉丹之所觀政觀

魚秀陰濂泉冰壺一碧  
石洲海邊春皆亭名

### 蒲澗行

君不見少君詫安期海上之棗又不見坡仙詠安期宅  
邊之蒲棗失其種豈復得蒲生於澗何時無澗流涓涓  
淺可涉牽蔓披沙按九節仙家自欲供仙餌靈根不容  
凡齒齧循澗按奇崑石幽瀑音迎耳鏘琅球陰壑常寒  
失炎熱終日自雨鳴春秋振衣策足崔嵬頂跨歷列缺

凌倒景天風海濤撼宇宙神清骨冷肝膽醒聲傳九霄  
景泰鐘更上上方梯晴空兩眼有盡天不盡滄溟浩與  
銀河通指顧神山仙非遠弱水誰云隔三萬乘風直到  
金銀臺握手安期話蒲澗

續蒲澗行

戊戌正月二十五搖轡東風蒲澗去年年今日是時節  
飛蓋傾城車塞路野亭山館坐不徧幙天席地千百處  
開壺設擲紛酒炙擘蠃錐蟻閒醢脯笑言相續樂甚真

禮文不移意則古我亦隨衆窮勝覽先訪安期登梵宇  
入春少雨多是晴穹巖寒溜僅一縷白雲千級逼象緯  
滄海萬里渺煙霧倚欄方快心目遠牛羊下山林壑暮  
小兒隊隊逐歸騶拍手呼舞趁簫鼓遊人到晚懽未厭  
徘徊不忍收尊俎行穿梅嶺還江西首為南州記風土

泛洞庭

解維武陵岸江肥雨新止兼程趨洞庭勢疾建瓴比銀  
光吞上下莫辨天與水我乃航其間滉漾藉一葦吏塵

貯兩袖到此劃湔洗黃昏打頭風洪波半空起舟子惶  
束手喧呼互排詆有篙無處著有纜無地艤鉄索二百  
丈牽貓卧沙底進難退不可簸弄任所以巨浪聲洪鐘  
合力撞舟尾一撞心一折通夕不知幾刻燭驗天明狂  
勢稍披靡卷索急飛艖半晝見涯涘危命脫針孔再生  
自今始人言岳州程風便五日耳漂滯費半月初意所  
不擬粉堞俄在眼層樓九霄峙憑欄氣方豁東望酸徹  
髓前日我片帆掀舞怒濤裏羊腸百八盤行路難如此



今知驚浪上羊腸尚可履在家貧亦好身安門埽軌  
鼻喧午窗風波儘千里

荆渚書懷

明鏡明於月白髮白於雪月照雪轉添使我心斷絕連  
年事行役曾不須臾歇陟岡脚雙繭凌湖舟一葉五觀  
君山面洪濤漲天閣重倚南樓欄遠鴈逐雲滅西風落  
破帽龍山酬九節搖鞭荆門去蒙泉弄清潔遊觀固不  
惡奔走計則拙眠指幾千里意者遂休轍困翮墮渚宮

因循入羈紲天涯寒苦蚤袖穿手龜裂邨沽酒力薄連  
醜耳方熱矯首飛白雲杳杳望吳越儒冠信誤身鑄盡  
六州鐵

憇農家

似陰還似晴好風弄輕柔土膏春犁滑竹深鳴禽幽農  
家頗瀟灑瀟灑清泉流蹇余入芳檐解帶為小留荆釵  
三兩婦競將機杼投吹爐問官人宵啣邨茶否羣兒窗  
下讀千字文蒙求余因拊其背觀汝蚤休休泓穎纔識

面白盡年少頭耕食而鑿飲胡不安箕裘迺翁聽我言  
急把書卷收遣兒出門去一人騎一牛

隱者

卓庵遠入深林去生怕世人知得處四邊賸卻許多雲  
重重塞斷山前路

有客

青春挽不回白髮摘不盡減圍羞做帶照面怯皎鏡功  
名知儻來甯問終南徑榮枯默有數豈待蓋棺定人世

如夢幻具眼須猛省毋為塵埃役而敗山林興亭前富  
葵花隔簾烜紅影雨餘老苞困欲謝若未忍有客適遇  
秋對此惜芳景從事在青州呼兒往三請

夢回

春意已深寒未了夢回斗帳房櫳悄五更三點殘月銷  
山鳥一聲先破曉

水琴

盎缶停涵水一泓中存雅意起器形欲滴未滴天地寂

須臾宮商若相賡妙趣不勞徽外索泛聲不自絃上生  
小點恩怨作兒語大點九皋聞鶴鳴疎數變化似有節  
多是洋洋流水音殘瀝斷續楚天曉餘響勾引南風薰  
平生箏笛厭鄭衛羌借古韻洗古心又如駒駟北窗  
睡兩耳不聽無虧成

小水寺

披霧入野寺寒林響西風誰遣僧出迎山鳥為我通染  
衣松露香照眼嵩花紅聊此息塵慮歸騎毋怱怱

訪山中友

披荆踏石訪山友，野鳥驚人鬧枯柳。  
牧童為我通姓名，一笑相迎鶴髮叟。  
結茅倚巖屋數閒，塵埃辟易不用帚。  
竹厨貯書羅四五，土壁黏碑分左右。  
山中新醅未堪壓，攜手邀我沽邨酒。  
牀前尚有著殘棊，忘記四圍關戶牖。  
日斜扶醉同歸來，但見黑白子紛糾。  
獼猴樹上周章走，莫是此曹來動否。

題王才叔南館

南館著隱士幽爽似僧舍  
鳥紅野花繁岸綠垂柳亞  
人行鳥不驚客至鶴先迓  
林深自無暑月到更宜夜  
傾尊對賢聖飛筆追鮑謝  
興來即散策無時不得暇

踏雪

玉壺一色天漫漫亂雪飛  
春減卻寒肩瓊節瑰塞宇宙  
柳絮如拳輓作團卻愁花木  
不禁冷攜筇問訊遍玉欄  
老柯膠枝幸亡恙紅苞半吐  
怯牡丹更憐修竹壓欲折  
扶持敲撼聲珊珊似醉忽醒  
僵忽立森然再植青琅玕

羣兒幻出兩獅子頃刻堆削了不難手持朱橘炯電眼  
并刀巧翦金鈴安老夫童心也自愛卷簾移坐忍凍看  
一杯暖寒不可再饑腸轉雷未朝食

讀離騷

琅然醉讀離騷經一鶴聞之來中庭童子屢麾不肯去  
直輦尊前側頂聽

倚欄

倚欄有恨無人說暮角吹梅寒聲咽急風卷雨過鴈鷺



吐下蘆花一枝雪

雪中徐檢法約登城樓不果

今年一雪恰一月天上弄巧寒饕餮朔風吹碎洞庭浪  
細結瑤花遍銀闕倚杖測試三尺強平陸皓皓失凹凸  
梅梢模糊裹寒香鳥影伶俚棲凍葉有客約上城南樓  
膏吾車兮俄復輟呼兒反關袁安巷小窗風味寒於鐵  
未須金帳斟羊羔薄酒也能春兩頰三杯五杯亦徑醉  
曲肱一枕香雲絕夢裏騎驢過灞橋記得新詩醒時說

送絜齋倉使袁都官歸班

六轡按部朝出關  
郵鈴插羽夜趣還  
詔字天飛紫泥濕  
一點郎星歸拱北  
鄉來翻動大壑魚  
致君堯舜真須臾  
金甌未啟請麾去  
旋頌漢節登范車  
先生有道出洙泗  
派分象山接洛水  
振鐸重席闡聖傳  
此心之外無二理  
先生有才輩伊周  
胸襟百萬森戈矛  
新亭官作楚囚泣  
誓楫一念清神州  
此行豈但蘭再握  
講帷欠公熙帝學  
火城照空沙隄新  
堂印押班運籌幄  
絜齋牆仞世龍門

辨香夙昔鑽仰心邑債一了即歸耕但當拭目天上新  
經綸日與漁樵繫壤歌太平

飲通幽園

典卻身上鷓鴣裘買酒領客尋清遊欲洗胸襟塵萬斛  
快上青雲展秋眸晴沙翳天風動地挈壺卷席移通幽  
一沼鏡淨清可釣千竿玉立塵不留拒霜兩岸花爛漫  
紅蓼錯雜爭開秋人生適意未易得癡兒了事何時休  
陶寫豈必在絲竹山有鳴禽水遊儵酒酣題蕉競新句

景物辟易困雕搜一梳涼月插空碧樓頭暮角催歸騎  
雙桂餘葩尚堪摘便道宵訪勿翦不

病中得鄔文伯書

北風卷地震穿屋光寒照几珠百斛兒童呼舞健犢奔  
病夫擁爐龜殼縮打門寄書勤故人五雲溼牖春生谷  
片辭自可愈頭風千金指迷况滿幅年來塵埃不堪鏡  
白髮一摘動盈匊星出星入難養痾安得閑邊半分福  
病中畏酒如畏仇詩囊亦遣高閣束聞君新工千兔禿

君但寫來為君讀

馬上口占

平林塗煙山擎日晚征漠漠客愁集浮生隙駒忙裏過  
虛名塞馬眼前失古來戰場莫回首一成一敗骨俱朽  
柳岸人家搖酒帘不妨小停春風鞭

題下陽懷沈叔忱

夜雨曉方歇薄霧隨征車喬松二十里翠微三五家雙  
燕教羣雛一牛馱兩鴉故人不可見回首天之涯

宿康口漁家

陰雲議雪風颼颼黃沙翳暝征人愁漁家假宿休疲骨  
敗蘆紉壁茅蓋頭行營鼓角聲動地釣翁不慣皆掩耳  
刺船火急入葭葦問訊鷗鷺莫驚起

適意

右傾老瓦盆左持離騷經一杯讀一句既醉還復醒好  
月飛入坐伴飲到天明林下樂如許鐘鼎鴻毛輕

水閣秋夜

雲收一點無秋洗  
四山淨野水吞長  
天涼月分兩鏡倚  
湖閣虛窈緣石竹  
修勁孤斟領幽寂  
新醪快邨硬露冷  
欺病骨更闌瞻斗  
柄欲去未屬饜倚  
欄成短詠

金山

自古稱浮玉更名為得金  
一山藏寺腹雙塔立江心  
淮浙中流斷風煙四岸侵  
夢回禪榻悄月午聽龍吟

秋夕

秋風動梧井無頃許多涼  
夜靜灘喧枕窗開月到牀  
道

心便冷澹世事絕思量  
只被澆花累朝朝卻用忙

劉子愿山居

搬向山邊住蕭然茅數椽  
平塘印星斗深谷騰風煙  
老不離書卷貧誰乞酒錢  
莫言無管待頻取好茶煎

空師欲遊嶽往訪山寺

聞師遊嶽去打急訪高岑躡屐  
若來晚挑包不可尋山  
寒梅意悄林茂鳥聲深  
行住無非道何須枉費心

酬曹戶



奔走塵埃久還山每歎遲歲華驚鴈到心事獨鷗知夜  
對尊前月晝尋花下棊閑中滋味好但欠子論詩

同崔糾訪陳道士

尋幽過橋去松徑入琳宮竹擺風檐綠榴殘雨院紅黏  
碑多古籀插架獨參同道士掀髯笑詩聯石鼎工

秋意

今年秋意好夜傍井梧生怪得雨聲急洗教山骨清倚  
欄看葉舞尋砌聽螿鳴舉目無非爽吟詩易得精

訪上官道人庵

三十年居此何常識酒葷柴扉人少到草徑鹿同羣  
雨足添新瀑山深有賸雲水瓢丹竈外閒事不曾聞

訪王廣文

未是閒時節君言百念灰棲身庵竹石適意杖莓苔  
人老無由少春歸卻解來呼兒烹茗筍席地共銜杯

招賢渡溪閣晚望

溪流清到底十頃浸秋光煙重山加色風狂鴈失行  
塵

埃雙老鬢天地幾斜陽何處一聲笛征人暗斷腸

琳宇

琳宇棲巖谷翛然一徑深風篁竿戛玉霜橘顆垂金是  
院皆扃戶無人但聽琴遶廊行數匝聊以洗塵心

維舟

望見人家了猶須轉一坳寺從灘背出船向柳邊梢問  
酒尋溪館呼兒解臘包三杯亦徑醉世事且權拋

贈隱居

遠屋垂垂柳當軒小小江買魚尋晚釣浮蟻倒春缸山  
近雲侵坐月來梅印窗隱居誰似子不羨鹿門龐

弋陽道中

千里歎行役今朝方半途橋肥霜後顆松落雨中鬢店  
姬當墟問官人要酒無忻逢埽愁帚沾了又還沾

倚樓

蒹葭秋色晚百尺倚江樓日暗煙藏寺風高浪拍舟歸  
雲投遠嶺饑鴈叫滄洲心事非年少塵埃白盡頭

舟中

繫纜停征櫂斜陽古渡頭風霜先遠客天地獨扁舟  
水鳥衝開浪汀鴻占斷秋在家貧亦好何用出林邱

夏日普信寺江閣

到此全無暑虛欄千里風看飛霜度水聽落石鳴空日  
月忙烏兔春秋遞燕鴻一生塵裏過煙艇羨漁翁

過寶雲寺訪密師

寺纔二三里曳杖且徐行晴塔松梢見風鐘嶺半鳴樵

夫分道過僧子就房迎竹有千竿立塵無一點生

送翼之過天台

天台山外窟人道是仙家白鶴挂寒溜赤城飛暮霞獨  
攜筇杖過若畏石橋斜牢記經行處歸來向我誇

遺意

要靜靜不得風吹竹打檐欄推呼匠葺碑脫遣兒黏夜  
短睡常欠天陰病轉添扶衰歸密室更下面前簾

信步

午窗方睡起信步過東畦穴徙蟻知雨巢穿燕補泥路  
埤連草沒果重壓枝低邨婦抱兒子籠邊教喚雞

安仁道中

半月離鄉井家音杳不聞路危多半缺橋朽忽中分秋  
盡風撥葉日沈巖宿雲荒邨店殊陋店主卻殷勤

送彥東還湘

湖南多爽氣羨子片帆還秋影清涵水煙痕澹著山蘭  
風香楚佩竹淚冷湘斑見說誅茅地江頭只數間

贈悟上人

怪來趨向別，乃是拙庵孫。  
秋色添禪寂，松聲奪俗喧。  
路行須避蟻，飯贖或呼猿。  
單鉢隨緣住，尋常懶出門。

贈慈上人

踏遍叢林後，歸來隱石崖。  
任梅斜到牖，聽竹長侵街。  
挂壁塵堆笠，穿山雲惹鞵。  
真機須要悟，餘事是持齋。

春郊

數點綠楊風，春光是處同。  
蜂喧搜蕊瘠，鳥鬧聒山聾。  
聯



句逢詩友尋僧問牧童家家辨農具準擬試新工

遣愁

愁來無可奈散策小橋東影轉松隨日香殘花怯風煙  
霞詩興裏天地酒杯中本是江湖客生涯付釣篷

次莊過荆渚以詩寄之

澤國遙千里雲帆隔兩州醉行沙市月吟破渚宮秋魚  
歎馮驩缺貂慚季子表人傳君入蜀無事蚤歸休

暑酌

天高殊未雨暑盛絕無風將酒渠心浸有泉林下通擘  
蓮房拍塞雪藕孔玲瓏量淺難禁醉扶歸兩小童

劉簿約遊廖園

名園新整頓尊酒約追隨春晚花飛少牆高蝶度遲注  
湯童煖酒拍案客爭甚寂寞鞦韆索無人盡日垂

秋夜懷歸

鄉里千山月塵埃兩鬢星秋聲雖是爽客耳不堪聽多  
淚風前燭孤明竹外螢吟蛩更無賴終夜幾曾停

山莊

門掩斜陽岸溪橫獨木橋  
山禽弄春舌隄柳舞風條  
世事雪雙鬢生涯水一瓢  
似聞鄰釀熟自往不須招

秋日同王顯父趙子野何莊叟泛湖趙紫芝繼  
至分韻得秋字

雨餘湖更爽載酒共清遊  
天淨倒涵水峯高爭獻秋風  
煙入吟筆簫鼓自鄰舟隄上詩人過相邀便留

鄔文伯歸自邵陽

賓主西遊久賡詩日日傳交情誰似此歸興忽翩然楚  
岸猿吟樹湘江月載船我窮君更甚相助愧無錢

宿古寺

黃昏投寺宿古屋瞰荒江邛酒沽春甕山房耿夜釭灘  
高聲撼枕月落影收窗僧老人皆玩樓鐘曉未撞

舟中

離家俄十日千里獨衰翁篷響過雲雨帆開逆水風新  
沙增岸腳小港隱蘆叢客思難消遣黃昏月一弓

送宗上人歸閩

頂笠遍參請平日志甚勤耳方離嶽瀑眼已接閩雲宿  
嶺星辰近渡溪煙霧分勸師蚤休歇禪不在多聞

送曹深叟之越

幾時重握手未可便輕離路指千巖去程寬一月期捫  
蘿窺禹穴剝蘚讀曹碑必自蘭亭過方當春暮時

訪子益

棟得溪山住三間草屋低坐貧憂酒債廢事悔碁迷壁

壞何時補詩成無處題留余余戒飲白飯薦黃鷄

拍闌

偶把闌干拍沙鷗水上驚晚紅殘照在秋碧遠山橫盡  
被浮名役皆從妄念生不如歸去好杖屨老柴荆

東邨

晴久全無雨溪乾半是沙風橫分鴈陣日轉趣蜂衙地  
僻草埋徑籬摧菊卧花橋西一林竹瀟灑兩三家

訪皇甫道士

道人留澹話竹院寂無聲  
沽酒童來緩題窗詩已成  
海珍紉紫菜仙品漬黃精  
移席臨檐月蕉桐膝上橫

送聰上人歸

辦得四方遊孜孜討入頭  
歸雲起齋鉢高浪送行舟  
笠戴天童雨屨穿雪竇  
秋平常心是道莫更問人休

舟夜

夜泊楓林岸江平萬籟收  
松崖猿嘯月蘆渚鴈眠秋  
軒冕儻來爾林泉歸去休  
客愁正無奈孤笛起漁舟

日融

日融風力軟，曳杖獨逍遙。  
蜂去花心靜，鶯遷柳影搖。  
一年春易老，兩鬢雪難消。  
客至時留飲，無緣特地招。

題及之後山新築茅舍

瀟灑人間世，柴門夾兩槐。  
詩僧恰方去，俗客不曾來。  
翠合苔初長，紅嬌杏半開。  
南邊許多地，臘月竹須栽。

范園避暑

六月暑如炊，追涼此地宜。  
掉舟荷柄颭，坐石竹陰移。  
壽



貫壺雙耳鼎烹茶一旗小童供筆硯醉客競賡詩

新秋旅思

兩袖塵埃滿千山道路勤曉清秋已到葉落客先聞鏡  
裏驚衰態眉間添皺紋人生間第一回首故山雲

鄭氏莊

莊居深僻處敲戶小童應此地清如許前時到未曾柳  
腰金腰裏苔髮翠鬢鬢山上茅亭子扶衰為一登

訪次章廣上人繼至

都不見塵埃園扉傍水開晴茵鋪碧草風彈落黃梅訪  
子因尋竹呼童急辦杯詩僧相繼至罷酒把茶來

常山道中

寒謝春纔展息息二月中算來晴幾日多是雨兼風煙  
草迷邨碧山桃夾竹紅浮名能役我策馬幾回東

夏夜

今夕暑差甚芒屨堦下行除燈檐月上卻扇竹風生病  
骨坐怕久靜吟詩易成夜涼思睡去樓鼓已三更

宿山觀

昏暮無處宿樵人指路頭僕夫嗟已困道士喜相留  
明月夜翻晝陰崖暑變秋聞雞便行路定要到潭州

化成巖

命友化成巖同尋頃刻間半途瞻佛塔數里入禪關  
松動影移日江清波漾山衛公讀書處有鷺宿其間

有李衛公

讀書堂公集中載白鷺賦

乍晴

日色今朝穩園林二月中池塘展晴綠桃杏鬪春紅犯  
險升高徑扶衰藉小童鸚怕人見飛過過野橋東

江閣夜

小閣臨江迴疎簾帶霧鉤雲鴻遙影滅灘月碎光流詩  
思偏宜夜衰髯不耐秋漁燈三兩點隱隱荻花洲

晚興

是處牛羊下喧譁走牧童霽煙拖澹碧夕照殞殘紅老  
鬢日添雪衰軀晚怕風愁來無著處分付酒杯中

莊居

三四間茅屋回環水石清  
雞催殘漏盡月截半窗明  
好句枕邊得浮名身外輕  
起來供日課先遶藥畦行

泊舟

泊舟似差蚤篙工愛酒坊  
羊羣歸遠隴柳影戀斜陽  
澤國人千里暮霞天一方  
茶多不思睡漁唱聽滄浪

聞舟中笛

橫笛秋篷底銜山夕照殘  
孤音起水面餘韻到雲端  
吹

怨蘆聲慘含悽鴈影寒有人江閣上斂翠憑闌干

寄友人

口信傳商賈年前未得歸  
湘沅淹異縣日月老征衣  
騷興遍芳渚舊樓閑釣磯  
思君不可見獨自立斜暉

清明小飲

草草清明飲惠風天氣和  
身輕梁燕舞舌巧柳鶯歌  
但道三春好其如兩鬢何  
升沈付杯酒由命不由他

過曹家渡

數篙撐過渡雨後水添肥山橘青迷樹野花香襲衣  
鴻悽遠客鬪雀墮斜暉童稚喧林壑牛羊箇箇歸

午炊剡陽一館甚雅

誰家三家市能令兩眼明花暄叢蝶戀檐午亂雞鳴忙  
裏青春去愁邊白髮生搖鞭問歸路更乞一旬晴

送同官葉樞院造朝

滿歲塵埃共交情骨肉親我猶京口客君已日邊人波  
及無忘晉渠成亦利秦西湖約攜手兩岸柳搖春

不眠

刺齒搜新句濡毫寫短牋讀來疎脫少  
懽喜不成眠

苦吟

幾度燈花落苦吟難便成寒窗明月滿樓上打三更

尋勝

老子攜筇杖小童挑酒壺徧尋泉石勝引路倩樵夫

傷春

飛蝶捎風絮鳴禽戀午檐不知春去未但覺綠陰添



踏青

四野春工遍柔風動賞心踏青喧柳陌舉白醉花陰

山寺

樹暗常疑夜山多易得雲撞鐘最深處嶺外不曾聞

題莊舍壁

水深荷較晚地僻草偏多佇立風前聽樵夫隔隴歌

無題

人與春俱老花因雨易殘天涯雲萬里腸斷倚闌干

後圃

澆花惟要蚤  
芟草不知名  
新竹生來巧  
南牆補數莖

吟髭

壯歲髭如漆  
年來暮景侵  
便令如雪白  
撚斷不妨吟

秋夜

秋到情懷惡  
美人天一  
方夜深窗轉  
月夢斷角吹霜

多景樓

北固危登最上層  
身浮霄漢手捫星  
江連淮海東南勝

山出金焦左右青天水精神清鴈骨風煙圖畫入秋屏  
蕭蕭古意憑欄久日盡斜陽沒遠汀

岳陽樓

洞庭雄壓岳陽樓萬里風煙萬里秋左右江湖同浩蕩  
東西日月遞沈浮青蛇鳴袖神仙過古瑟彈湘帝子遊  
朝暮飛鷗千百點送迎城下去來舟

江樓會飲對月

層樓畫棟凌霄漢檻外江流百頃清無一片雲但秋色

放千里月到天明喚舟撒網鮮鱗美擊鼓喧汀宿鷺驚  
坐上有人懽未厭酒闌連酌兩三觥

訪別胡倅留飲水閣

故人知我已膏車折簡殷勤祝訪渠惜別怱怱留語笑  
臨時草草治餽蔬密遮池面荷千蓋斜插雲頭月一梳  
此夕憑欄又何日鴈來莫惜數行書

春嬉

十分晴色趁春嬉鄰有灰驢借我騎舌轉雖然聞翠柳

葉濃卻不見黃鸝小詩題壁同僧和了角攜琴更鶴隨  
傍水誰家亭子好萬竿竹影浸琉璃

送端叔遊淮

堂堂玉立鬚垂腹譚論逢人見肺肝手弄七絃琴韻古  
腰橫三尺劍光寒但將計策尋知己肯學閭閻為覓官  
烏幕聞君定羅致別尊不復話儒酸

蚤征

店雞一唱接疎鐘起整行裝尚夢中沙路踏殘征馬月

柳隄啼斷曉鶯風水肥渡險添舟子岸沒途窮問牧童  
千里鄉人逢陌上片時握手各西東

明皇

初年不是不聰明勤政開元致太平一曲羽衣妃子進  
三朝錦祿祿兒生眼乾蜀道山川淚膽碎漁陽鼙鼓聲  
禍福興亡皆自取信知女色鮮傾城

郊行同張宰

雨晴郊外共尋芳細水交流注野塘花欲戀枝風不冑

柳纔舞影日還藏轉添老態難於健看得閑時少似忙  
擬訪一僧共茶話禪房局鑠出遊方

湖亭夜飲會別友人

每聞嗟歎無知己定要攜琴過浙東莫訝釀尊俱草草  
只因束擔去怱怱竹籬夜影千竿月荷送湖香萬葉風  
蚤晚我尋京口戍子歸或遇半途

縱步

久雨厭人妨野步幾時便得此番晴到橋喚僕來相助

過寺逢僧約共行  
籬落一團飛蝶汀  
洲數點點立鷓鴣  
誰家竹裏深深住  
風度茅檐紡織聲

晚征

回首家山已十程  
搖鞭自笑苦勞生  
雲先帶暝崑邊宿  
月獨伴人溪上行  
草屋停驂難可意  
店翁叱犬不容聲  
明朝路遠起須蚤  
第一鷄啼是五更

茶罷

茶罷晴檐唱午雞  
偶騎驢去過東溪  
酒銷分倩樵夫挈



筆硯專令童子攜放目水亭欄獨倚題詩僧舍壁新泥  
興闌歸問來時路到處蟬鳴日已西

送魯卿之九江

歸自瀟湘方半月挑燈酌酒又分襟挂帆秋晚江湖客  
握手歲寒松柏心湓浦水流清一派香爐峯溼翠千尋  
西風遠想登臨處日日携琴日日吟

泊舟周家步

梢子商量乘蚤泊向前十里不逢邨卸帆斂柁依山腳

繫纜添椿傍樹根，月魄知風昏有暈。  
秋光入水淨無痕，五更露下欺孤枕。  
忽聽新鴻更斷鳧。

避暑溪上

不堪蝸舍暑如炊，何處清幽可杖藜。  
未約客須先覓酒，要尋涼必去臨溪。  
撐船訪洞林間港，坐石吟風柳下隄。  
晚網得魚似湖白，鸞刀鱠玉擣香齏。

宿橫山

頗厭東征道路長，回頭十日離鄉邦。  
埽愁酌酒雖云獨。

照影挑燈卻暫雙打併餘花風動地遷延殘夜月留窗  
店雞已唱催人起更聽疎鐘隔水撞

張園

幾年人說張園好筇杖芒屨欠我遊泉脈涓涓三里遠  
山根匝匝四時流鶴嫌竹密妨來往蝶厭花多費應酬  
臺館高低皆得所松間亭子最清幽

溪上

一番雨過驟晴時溪上春光色色奇日暖花繁蝴蝶困

水清魚過鷺鷥隨邨翁開卷添黏紙瓦鉢研朱自教兒  
織婦倚機方歎息輸官尚欠二斤絲

同趙尉飲江亭

草草三間兩眼明數峯如畫一江橫風烏破浪帆檣急  
野鷓過林鳥雀驚蟻取浮芻尤有味魚方出網正宜羹  
流鶯憐我無歌者黃舌頻翻柳上聲

懷亭父

兩年隻影瀟湘去料想塵埃白髮侵久雨千山秋得意

西風一鴈客關心  
突於夢裏陪譚笑  
每向人前問信音  
憶昔賡詩巖桂下  
花開今日歎孤斟

題邨舍壁

柔風十里日曛曛  
雨後陂塘野水通  
兩岸柳煙籠曉綠  
數枝桃露滴春紅  
明知鐘鼎衆皆羨  
到了山林味不同  
田父殷勤邀我坐  
一盂白飯一盂菘

宿妙果寺贈洪上人

上人留我禪房宿  
煮筍烹茶語夜闌  
鐵馬鳴風山牖寂

木魚敲雪曉廊寒真筌但要此心悟公案休將故紙鑽  
若道吾言沒滋味請師且去坐蒲團

訪黃簿留飲

愛靜移家住水南門排古本枕寒潭鶴翎漸長呼童翦  
麈尾頻揮對客譚旋切銀絲鱠鮮鯽新嘗金顆擘香柑  
惜余戒飲難陪伴舉白掀髯子獨酣

行春

綠楊嫋嫋草萋萋緩步行春獨杖藜搜蕊蜂兒透花骨

增巢燕子砌芹泥過溪野水衝橋版覓路田塍穿菜畦  
松竹林間僧揖我謁茶攜手上招提

泊舟黃家渡

溪流暴漲舟如箭夜向深灣穩處停猛虎嘯風威動壑  
飛鴻過月影移汀青山入夢催歸櫂白髮欺人歎暮齡  
幸得還家玩光景歡醅終日醉休醒

登樓野望

雲藏日影微吞吐道是晴來又似陰秋色涵空醒醉眼

鴈聲到耳引歸心  
暴流決岸危橋斷  
古木堆煙遠寺深  
自料短才無用處  
任緣不復覓知音

題會稽用林師侍韻

東越乾坤到眼邊  
亂雲連壑草迷川  
五更城落千崑月  
萬頃湖開一鏡天  
鼓角聲殘秦望曉  
樓臺影溼卧龍煙  
舊時太史登臨處  
每想風流為慨然

孫王渡

霽後泥途行尚艱  
今年大率是晴慳  
春當濃處寒猶在



寒宵消時春漸還  
木杪紅沈半輪日  
波心碧浸兩邊山  
渡頭不住人來往  
共羨白鷗雲水閑

胡教授釀杯觀畫圍碁

山筍野菽且隨宜  
約定同來最怕遲  
朋友每思相聚樂  
塵埃難得有閑時  
春回畫筆丹青軸  
電落文楸黑白碁  
醉客坐間誇俊逸  
掀髯連寫數篇詩

沿檝宿虎山山家

高低田水曲通池  
小小人家短短籬  
杜宇教唆春去蚤

陰雲遮蓋月明遲年華只解催教老公事從來了是癡  
若不隨緣強煩惱漫添兩鬢幾莖絲

題戴洪甫愛竹軒

竹癖難憑俗眼看琴書靜對翠光寒秋聲鳴屋風初度  
夜影翻牀月半殘天乞幽人供嗜好日呼稚子報平安  
窗前幸有閑田地分我雲梢四五竿

宋百家詩存卷二十五